



# Luta Hamutuk

INSTITUTU BA PESQUIZA/INVESTIGASAUN, ADVOKASIA NO KAMPAÑA  
*Timor-Leste Institute for Research, Advocacy and Campaigns*

**Address:** Rua Gov. Celestino da Silva-Farol, Aldeia Lirio, Suco Motael, Vera Cruz, Dili  
**Email Add:** { [HYPERLINK "mailto:lutahamutuk.timorleste@gmail.com"](mailto:lutahamutuk.timorleste@gmail.com) }  
**PO. BOX:** 1034, Correios, Dili, Timor-Leste  
**Tel:** (+670) 332 2619 or 726 3783 & 724 3966

---

## Komunikadu Da Imprensa

**Kondisaun Eskola Pre-Sekundariu N<sup>o</sup> 01 Bazartete, Filial Fatumasi la Favoravel**

**Atu Hala`o prosesu Aprendizajen:**

**Luta Hamutuk Ejji ba Ministru Edukasan hodi rehabilita Imediatamente!**

### **Intrudusaun**

Escola Pré-Secundário N<sup>o</sup> 01 Filial Fatumasi sub Distrito Bazartete, Escola ida ne'e hari'i iha tinan 2002, ne'ebé ho iniciativa juventude no comunidade sira husi suco ha'at (4) mak hanesan; Suco Leorema, Suco Fahilebo, Suco Metagou no Suco Fatumasi. Razaun hari eskola nee tamba estudante husi suco hirak ne'e nia asesu ba eskola pre-sekundariu Boboro, nebe nia distansia dok tebes kuaze 15 km nebe fo impaktu negativu ba vontade alunos sira ba eskola.

Durante eskola nee har'i iha tinan 2002, hetan ajudu husi "Corpo da Paz" ne'ebé fó tulun material mak hanesan; kalen tahan, semente, ai, triplex, prego, quadro maibe comunidade (juventude, inan aman no profesores) mak halo rasik eskola nee. nune'e iha tinan 2004 hetan ajuda mos husi Madres Congregação Escravas do Sagrado Curação de Jesus fó tulun material escola nian mak hanesan Kadeira plastik 50 ba escola ne'ebé refere, nune'e mos hetan ajuda husi Padre Estasaun Missionary de Bazartete ne'ebé fó tulun mos liu husi material escola mak hanesan kadeira, maibé to'o agora kadeira hirak ne'e a'at hotu ona. Iha tinan 2005 Governo fó deit kadeira ho meza hamutuk 105 ba escola ne'ebé refere maibé lato'o tamba kada tinan estudante sempre aumenta.

### **Kondisaun Eskola**

#### **1. Numero Asesu Alunos**

Numeru asesu alunos iha eskola nee iha tinan 2002 nee hamutuk 45 pesoas, 2003 hamutuk 45 pesoas, 2004 hamutuk 111 pesoas, 2005 hamutuk 180, 2006 hamutuk 195 pesoas, 2007 hamutuk 225, tinan 2008 250 pesoas tinan 2009 hamutuk 257 pesoas.

## **2. Infrastruktura**

Eskola Pré-Secundária Nº 01 de Bazartete filial fatumasi iha edifisio (gedung) rua kada gedung ida iha sala (ruangan) ha'at no edifisiu ida seluk mos sala (ruangan) ha'at. Husi infrastruktura hirak nee sala 6 nebe uja hodi hanorin no sala seluk uja ba sala profesores no armazen. Edifisiu edifisiu eskola ida har`i iha tempo kolonial portuges no ida iha tempo akupasaun Indonesia.

Kondisaun edifisiu eskola nee la favoravel ona hodi hala`o prosesu aprendizazen tamba kalen barak mak kuak, uma nia kakuluk kesi ho aramen no kalen balu la iha ona tamba anin sobu, haris fatin no sentina a`at, odamatan ho janela a`at no la iha sanitasaun bemos, la iha sala ba biblioteka. Kondisaun infrastruktura nebe mak la reflata numeru alunos mos nia impaktu mak alokasaun alunos la tuir kurikulum(40/sala), tamba iha eskola nee alokasaun alunos ba kada sala 50-60 pesoas.

## **3. Profesores**

Profesore iha eskola nee hari iha tinan 2002 nebe hamutuk 15 maibe profesores mak hanorin iha eskola nee agora hamutuk 14 pesoas ho seguransa nain 1. Husi numero profesores nebe mak eskola nee iha nain 1 (ida) mak permanente no nain 14 kontratadu. Numero profesore mak iha seidauk reflata mos material mak iha tamba eskola nee sei falta profesores ba material ekonomia no desporto.

## **4. Fasilidade**

Resultadu monitorizasaun nebe mak focal point Luta Hamutuk halo dadus hatudu katak fasilidade hanesan meja no kadeira limitadu tebes tamba numeru alunos barak liu fasilidade hirak nee. Kondisaun ida nee halo alunos sira tengki tur iha meja no kadeira ida ema nain 3-4 hodi tuir prosesu aprendizazen, iha parte seluk profesores sira mos la iha kadeira hodi tur tamba kadeira iha sala profesores mos fo hotu ba alunos sira no Iha eskola nee la iha livro nebe atu suporta ba prosesu aprendizazen.

## **Posisaun Luta Hamutuk Nian**

Bazea ba resultadu monitoramentu nebe mak focal point Luta Hamutuk iha Bazartete halo Luta Hamutuk hakarak hatu Luta Hamutuk nia posijaun hanesan tuir mai nee:

- Lolos governu liu-liu Ministeriu Edukasaun, tengki suporta inisitiva komunidadade nebe mak hari eskola, hodi ajuda sira nia oan hodi bele eskola besik. Atu nune alunos sira iha nafatin vontade hodi ba eskola.
- Luta Hamutuk hare katak Governu liu-liu Ministeriu Edukasaun, seidauk iha vontade no planu nebe diak hodi dezenvolve Edukasaun iha Timor Leste. Liu-liu iha area remotas tamba la iha sensibilidade ba kondisaun eskola nebe mak alunos no profesores sira infrenta, hanesan eskola Pre-sekundariu Nº 01 Filial Fatumasi.
- Luta Hamutuk hare mos katak kondisaun eskola nebe mak profesores no alunos sira infrenta nee, hatudu kapasidade fraku husi Ministerio Edukasaun nian. Tamba la konsege resolve kondisaun eskola mak tuir lolos bele resolve lalais.

- Iha politika IV governu konstituisaun, liu-liu iha area Ministeriu Edukasaun katak ensinu baziku tinan 9 hahu tinan 2010. Maibe la iha preparasaun ne'ebe diak atu aseguara aktividade ensinu baziko, tamba infrastruktura barak mak seidauk preparadu

## **Rekomendasaun**

Luta Hamutuk mos hakarak hato Pontus rekomendasaun balun ba governu, liu-liu Ministeriu Edukasaun hodi bele konsidera, mak hanesan tuir mai nee:

- Rekomenda ba Governo liu-liu Ministeriu Edukasaun atu halo levantamento dadus, hodi halo rehabilitasaun ba kondisaun eskola pre-sekundariu No 1 filial Fatumasi nebe mak nia kondisaun la favoravel atu hala`o prosesu aprendizajen.
- Rekomenda ba Governu atu fornese fasilidade hanesan livro, meja, kadeira nebe bazea ba numeru alunos eskola nee, tamba fasilidade hirak nee la to no a`at mak barak.
- Rekomenda ba Governu atu dada bemos ba eskola nee atu nune alunos sira bele uja ba haris fatin no sentina.
- Rekomenda ba Ministeriu Edukasaun atu halo levantamentu dadus ba eskola pre sekundariu Fatumasi nomos area remotas nebe mak kondisaun infrastruktura no fasilidade la favoravel atu halao aprendizazen.
- Rekomenda ba Ministeriu Edukasaun atu hasae kursu profesores iha eskola pre-sekundariu filial Fatumasi, tamba sira foin iha profesores baixaraletu nain 1 (ida).
- Rekomenda ba Ministeriu Edukasaun atu hare mos kesejateraan profesores iha eskola pre-sekundariu filial Fatumasi tamba profesores hirak nee to agora barak mak sei sai profesores kontratadu.
- Rekomenda ba Ministeriu Edukasaun atu aumenta profesores iha eskola nee tamba sei falta profesores ba ekonomia no desporto nian.

Díli, 1 de Fevereiro 2010

**Mericio Akara**

Direitur Luta Hamutuk

Tel: (+670) 7263783